

## **Meeqqanik pinerliisimanginnermut uppernarsaatnik piumasqaateqartussaataaneq pillugu Inatsisartut inatsisaat nr. 8, 19. maj 2010-meersoq**

### Atuuffia

§ 1. Inatsisartut inatsisaat manna atuuppoq pisortat ingerlatsinermi oqartussaaffiit tamanut aamma namminersortunut, inunnut aamma inatsisitigut inuttaasunut atorfinitsitaanermut atatillugu aamma inunnut sulisorineqartunut, atorfeqarnerminnut sulinerminnulluunniit ilaatillugu meeqqanik 15-it inorlugit ukiulinnik toqqaannartumik attaveqartartunut, tak. § 3.

### Meeqqanik pinerliisimanginnermut uppernarsaatit

§ 2. Inatsisartut inatsisaat manna naapertorlugu meeqqanik pinerliisimanginnermut uppernarsaat paasineqassaaq tassaasoq Pinerluuteqarsimasunik Qitiusumik Nalunaarsuiffimmiit paasissutissat, inuit atorfininnerminnut sulilernerminnulluunniit ilaatillugu meeqqanik 15-it inorlugit ukiulinnik toqqaannartumik attaveqartartussat atorfinitsinnissaannut sulilersinnissaannulluunniit atatillugu, piumasarineqarnerata kingorna Naalagaaffiup Politiivinit ingerlateqqinneqarsinnaasoq. Paasissutissat ingerlateqqinneqassapput ilusilerlugit uppernarsaatit, Pinerluuteqarsimasunik Nalunaarsuiffiup paasinaasimanermit immikkoortuanit paasissutissanik, aalajangiisimanernik aalajangiisimanermut immikkoortumut allaqqasunik allaqqanikuusunilluunniit imaqartillugu, pinerluttaalisitsinermilu inatsimmi § 79-ip, § 79, tak. § 89-ip aamma § 85-ip unioqqutissimanerannik aamma §§ 74-ip aamma 84-ip meeqqamut 15-it inorlugit ukiulimmut tunngatillugu unioqqutissimanerannut atatillugu paasissutissanik.

Imm. 2. Uppernarsaammut imm. 1-imi taaneqartumut aammattaaq ilaapput § 53-imik, § 53, tak. § 52a-mik aamma § 56a-mik unioqqutitsisimanerit pillugit paasissutissat aamma §§ 49-mik aamma 56-imik unioqqutitsisimanerit pillugit paasissutissat tamatumani meeraq 15-it inorlugit ukiulik pinerlineqarsimappat, pinerluttaalititsinermi inatsit 1. januar 2010 sioqqullugu atuuttoq naapertorlugu.

Imm. 3. Nalunaarsukkat assilinerannut imm. 1-imi pineqartumut aamma ilaassapput Pinerluuteqarsimasunik Nalunaarsuiffiup paasinaasimanermut immikkoortuanit paasissutissat aalajangiinernut nalunaarsuiffiup aalajangiisimanermut immikkoortuanit allaqqasunik allaqqanikuusunilluunniit nalunaarsugaasut, pillaasarnermut inatsimmi § 222-mik, § 222, tak. §§ 224 aamma 225-mik unioqqutitsisimanernut tunngasut aamma §§ 210 aamma 232-mik unioqqutitsisimanernut tunngasut, tamatumani meeraq 15-it inorlugit ukiulik pinerlineqarsimappat.

Imm.4. Imm. 1–3, tak. § 3, meeqqanik pinerliisimanginnermut uppernarsaat aatsaat piniarneqarsinnaavoq paasissutissani pineqartup allakkatigut akuersineratigut. Akuersinermiit ukiup ataatsip qaangiunnerani akuersissut atorunnaassaaq. Akuersissummut makku pillugit paasissutissat ilaassapput:

- 1) paasissutissat suut ingerlateqqinneqarsinnaanersut
- 2) paasissutissat kimut ingerlateqqinneqarsinnaanersut, tassunga ilanngullugu Kalaallit Nunaanni

pisortanut aalajangersimasunut, suliffeqarfinnut, peqatigiiffinnut il.il., aamma

3) tiguisussatut allaqqasumit paasissutissat qanoq atorneqarsinnaanersut.

Imm. 5. Meeqqanik pinerliisimanginnermut uppersaatiip piniarnerani pisortaqarfiup, suliffeqarfiup, peqatigiiffiup il.il., tak. § 3, imm. 1-2, nalunaassavaa, meeqqanik pinerliisimanginnermut uppersaammik paasissutissat siunertamut sumut atorneqarniarnersut.

### Meeqqanik pinerliisimanginnermut uppersaammik piniarnissamat pisussaaffik

§ 3. Pisortaqarfiit, suliffeqarfiit, atuarfiit peqatigiiffiillu makku meeqqanik pinerliisiman-nginnermut uppersaatinik piniartussaataapput, tak. § 2, inuit pisortatut, assistentit, ilinniartitsisut, atuartitsisut, perorsaasut, perorsaasunut ikiortit, klubbini perorsaasut, angerlarsimaffimmi paarsisartut, plejeritangerlarsimaffimmi paarsisuni perorsaasut, angajoqqaarsiatut, barne- og socialhjelperit, isumaginninnermi siunnersortit, paarsisut, pedelit, pedelinut ikiortit, nakorsat, juumuut, peqqissaasut, sundhedsassistentit, sundhedsmedhjælperit, fyioterapeutit, napparsimasunik ikiortit, portørit, igaffimmi kantiinanilu sulisut, eqqiaasut, atuarfimmi psykologit, tale/hørepædagogit, tapertaalluni perorsaasut, ilitsersuisut, tassunga ilanngullugit pinngortitaq pillugu ilitsersuisut, ilinniarluni sulinermik sungiusartut, allaffissornikkut sulisut, nalunermik ilinniartitsisut, naluttarfinni sulisut aamma atorfinni pineqartuni taartaasut atorfinitsinneqassatillugit sulisinneqassatillugilluunniit:

1) Kommunalbestyrelsi meeqqat atuarfiinut, kommunimi ulloq-unnuarlu suliffeqarfinnut, kommunimi ulluunerani neqeroorutinut, kommunimi meeqqanut 15-it inorlugit ukiulinnut sunngiffimmi klubbinilu neqeroorutinut oqartussaasut aamma meeqqanut suli atualinngitsunut perorsaanikkut ineriartuutaasunik ulluunerani neqeroorutit pillugit Inatsisartut peqqussutaat naapertorlugu angerlarsimaffimmi namminersortut paarsisartunik akuersinerminnut atatillugu aamma meeqqanik 15-it inorlugit ukiulinnik nalinginnaasunik angajoqqaarsianut, tassangaannartumik angajoqqaarsiaasartunut, inuutissarsiutigalugu angajoqqaarsianut aamma ilaqtariinnik oqilisaasunut inissiinginnermi.

2) Naalakkersuisut, napparsimavinnut, Dronning Ingridip Napparsimavia ilanngullugu, Namminersortut Oqartussat ulloq-unnuarlu, innarluutilinnut tunngasut ilanngullugit, suliffeqarfiinut oqartussaasut.

3) Ulloq-unnuarlu suliffeqarfiit imminnut pigisut namminersortullu imaluunniit namminerisamik ulluunerani, sunngiffimmi klubbitullu neqerooruteqartut meeqqanut 15-it inorlugit ukiulinnut saaffiginnittut.

4) Tunngaviumik atuarfiit namminersortut, tunngaviumik atuarfiit namminersortut aamma angerlarsimaffimmi atuartitsineq il.il. efterskolillu pillugit Inatsisartut inatsisaat naapertorlugu atuartitsinermik neqerooruteqartut suliffeqarfittullu imminnut pigisut ingerlanneqartut.

5) Peqatigiiffiit namminersortut, meeqqanik 15-it inorlugit ukiulinnik sammisaqartut.

Imm. 2. Aammattaaq peqatigiiffiit il.il. makku meeqqanik pinerliisimanginnermut uppersaatinik piniartussaataapput, tak. § 2, inunnut pisortaqarfimmu, peqatigiiffimmu il.il.

attuumassuteqalersunut atatillugu, meeqqanik 15-it inorlugit ukiulinnik sungiusaasut, ilitsersuisut, holdlederit, aqutsisut, ikiortit, ilinniartitsisut atuartitsisutulluunniit ingerlatsisussanut, taakkununga ilanngullugit ikiortit, taartaasut, kingoraartaasut aamma ilinniartut sungiusarlutik sulisut:

- 1) Timersoqatigiiffiit, Kalaallit Nunaanni Timersoqatigiiffiit Kattuffiannut ilaasortaasut.
- 2) Timigissartarfiit.
- 3) Nipilersornermik qitinnermillu ilinniarfiit.
- 4) Spejderit.

Imm. 3. Kalaallit Nunaanni Ilagiinni atorfinitsitsisartutut oqartussaasup inunnik biskoppit, provstitut, palasit, ajoqit, pattattutullu atorfinitsitsinnginnermini sulisitsilinnginnerminiluunniit pisussaaffigaa, meeqqanik pinerliisimannginnermut uppersaammik piniarnissaq, tak. § 2. Aammattaaq upperisarsioqatigiinni Ilagiit Kalaallit avataanniittuni atorfinitsitsisartutut oqartussaasumit imaluunniit oqartussaasunit qularnaarneqassaaq, palasimik atorfinitsitsisoqannginnerani sulilersitsisoqannginneraniluunniit meeqqanik pinerliisimannginnermut uppersaammik piniartoqarnissaa.

Imm. 4. Imm. 1-3 naapertorlugit meeqqanik pinerliisimannginnermut uppersaatinik piniarnissamut pisussaaffik taamaallaat atuuppoq inunnut atorfininnerminnut sulilernerminnulluunniit atatillugu pisortaqaarfimmut, suliffeqaarfimmut, atuarfimmut peqatigiiffimmulluunniit aalajangersimasumik attuumassuteqalersunut. Aalajangersimasumik attuumassuteqarneq paasineqassaaq tassaasoq, atorfininnermiit imaluunniit sulilernermiit inuup attuumassuteqarnera ataasiaannarnerunilu sivikitsuinnaangitsoq. Taama pisoqartillugu meeqqanik pinerliisimannginnermut uppersaat pissarsiarineqarsimassaaq, pineqartup atorfininnginnerani sulilinnginneraniluunniit. Taamaattoq qanorluunniit pisoqaraluarpat meeqqanik pinerliisimannginnermut uppersaat pissarsiarineqareersimassaaq inuup pisortaqaarfimmut, suliffeqaarfimmut, atuarfimmut, peqatigiiffimmut il.il. qaammatit pingasut qaangerlugit attuumassuteqalerneraniit kingusinnerpaamik sapaatip-akunnerisa pingasut qaangiunneranni, piffissallu taassuma iluani minnerpaamik pingasoriarluni imaluunniit minnerpaamik sapaatip-akunnera ataaseq ataavartumik atorfinni imm. 1-3-mi pineqartuni sulisimappat. Tamannali taamaallaat atuutissaaq pineqartoq pisortaqaarfimmut, suliffeqaarfimmut, atuarfimmut, peqatigiiffimmut il.il. attuumassuteqartuassappat.

Imm.5. Imm. 1-3-mi pineqartutut inuk pisortaqaarfiup, suliffeqaarfiup, atuarfiup, peqatigiiffiup il.il. ataatsip iluani atorfimmut suliffimmulluunniit allamut nuuppat meeqqanik pinerliisimannginnermut uppersaat piniarneqaqqittariaqanngilaq. Assinganik atuuppoq pineqartoq atorfinitsitaqqippat sulilerseqqitaappalluunniit, pisortaqaarfimmut, atuarfimmut, suliffeqaarfimmut, peqatigiiffimmut il.il. attuumassuteqarunnaarallarnera pissusissamisuginnartumik sulinngikkallarnermik peqquteqarpat, assersuutigalugu ukiumit atuarfiusumiit tullianut ikaarsaarnermi imaluunniit piffissami aalajangersimasuni sulinermiit tullianut ikaarsaarnermi.

Imm.6. Naalakkersuisut meeqqanik pinerliisimannginnermut uppersaatinik pissarsiniartarneq pillugu malittarisassaliorinnaapput, tassunga ilanngullugu nakkutillineq pillugu, aamma aalajangersinnaavaat, meeqqanik pinerliisimannginnermut uppersaatinik pissarsiniartarnermut aammattaaq atorfillit sulisullu imm. 1-3 taaneqartut avataanniittut ilaatinneqassasut.

**§ 4.** Pisortat aamma namminersortut inatsisitigullu inuttaasut § 3 naapertorlugit meeqqanik pinerliisimannginnermut uppersaatinik piniartut, meeqqanik pinerliisimannginnermut uppersaatit tiguniariutaa aserortertassavaat aammalu teknikkikkut aaqqissuussinikkullu qularnaassallugu meeqqanik pinerliisimannginnermut uppersaatinik paasissutissat

susassaqqanngitsunit takuneqqannginnissaat, atornerlunneqqannginnissaat allatigulluunniit Inatsisartut inatsisaata matuma akerlianik pineqqannginnissaat.

### Pineqaatissiissutit pillugit aalajangersakkat

§ 5. § 3-p unioqqutinnera akiliisitaanermik nassataqassaaq. Aammattaaq akiliisitsisoqassaaq meeqqanik pinerliisimanginnermut uppernarsaammi paasissutissat akuerisaanngitsumik ingerlateqqinneqarpata.

Imm. 2. Ingerlatseqatigiiffik, peqatigiiffik, suliffeqarfik imminut pigisoq, aningaasaateqarfik assigisaalluunniit unioqqutitsippat, inatsisitigut inuttaasoq akiliisussanngortitaasinnaavoq. Suliffeqarfik naalagaaffimmit, Namminersorlutik Oqartussanit, kommunimit kommunilluunniit ataatsimooqatigiiffiannit, kommunalbestyrelsit nunaqarfinnilu aqutsisut il.il. pillugit Inatsisartut inatsisaannut ilaasumit, aktieselskabimit, piginneqatigiiffimmit assigisaanilluunniit tamakkiisumik ilaannakortumilluunniit ingerlanneqartoq unioqqutitsippat, suliffeqarfik akiliisussanngortitaasinnaavoq. Tamannattaaq atuuppoq unioqqutitsisut tassaappata Namminersorlutik Oqartussat, kommuni imaluunniit kommunit ataatsimooqatigiiffii, kommunalbestyrelsit nunaqarfinnilu aqutsisut il.il. pillugit Inatsisartut inatsisaannut ilaasut.

Imm. 3. Inatsisartut inatsisaat manna naapertorlugu maleruaqqusaliani, maleruaqqusaliamik unioqqutitsinerit akiliisitsinermik pineqaatissinneqarsinaaneri aalajangersaaffigineqarsinnaapput.

### Atuuttuulerfia

§ 6. Inatsisartut inatsisaat atuutilerpoq 1. august 2010 atuulluni atorfinitsitsinernut sulilersitsinernulluunniit 1. august 2010-miit kingusinnerusukkullu pisunut.

Namminersorlutik Oqartussat, ulloq 19. maj 2010

Kuupik Kleist

/

Mimi Karlsen